

Na osnovu čl. 12. tačka c) i 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96, 3/96, 16/97, 14/00, 4/01, 28/04 i 6/13), člana 14., a u vezi čl. 3. i 6. Zakona o ustanovama ("Službeni list RBiH", br. 6/92, 8/93 i 13/94), člana 6. stav (1) Zakona o pozorišnoj djelatnosti ("Službene novine Kantona Sarajevo", broj 42/13 - Prečišćeni tekst), čl. 13. i 14. Zakona o muzejskoj djelatnosti ("Službene novine Kantona Sarajevo", br. 2/00 i 7/05) i Pravilnika o uslovima za osnivanje i početak rada muzeja, muzejskih zbirki, muzejskih izložbi i galerija ("Službene novine Kantona Sarajevo", broj 24/00), Skupština Kantona Sarajevo, na sjednici održanoj dana 10.09.2014. godine, donijela je

#### ODLUKU

#### O SPAJANJU JAVNIH USTANOVA KULTURE U JAVNU USTANOVU "CENTAR ZA KULTURU KANTONA SARAJEVO"

##### Član 1.

(Predmet Odluke)

Ovom Odlukom uređuje se spajanje kantonalnih javnih ustanova kulture i to:

- a) Javne ustanove "Bosanski kulturni centar Sarajevo",
- b) Javne ustanove "Collegium artisticum", Sarajevo.
- c) Javne ustanove za organizovanje kulturnih programa i međunarodnu saradnju u kulturi "Sarajevo art", u Javnu ustanovu "Centar za kulturu Kantona Sarajevo".

##### Član 2.

(Osnivačka prava i Organizacija Javne ustanove)

- (1) Kanton Sarajevo zadržava osnivačka prava nad Javnom ustanovom "Centar za kulturu Kantona Sarajevo", koja nastaje kao kantonalna javna ustanova u svojini Kantona spajanjem Javnih ustanova iz člana 1. ove Odluke.
- (2) Prava i dužnosti osnivača obavljat će Ministarstvo kulture i sporta Kantona Sarajevo (u daljem tekstu: Ministarstvo) i Vlada Kantona Sarajevo (u daljem tekstu: Vlada), svako u okviru svojih nadležnosti.
- (3) Javna ustanova iz stava (1) ovog člana se organizuje u tri organizacione jedinice i to:
  - a) organizaciona jedinica "Bosanski kulturni centar" za opšte kulturne djelatnosti;
  - b) organizaciona jedinica "Collegium artisticum", za galerijsku djelatnost;
  - c) organizaciona jedinica "Sarajevo art" za muzičko scenske djelatnosti.
- (4) U Javnoj ustanovi organizuje se "Služba za opšte, pravne i tehničke poslove, marketing i propagandu".
- (5) Pravilima Javne ustanove i Pravilnikom o unutrašnjoj organizaciji i sistematizaciji Javne ustanove bliže će se urediti organizacija Javne ustanove, te sistematizovati poslovi i zadaci u okviru svake od organizacionih jedinica iz stava (3) i službe iz stava (4) ove Odluke.

##### Član 3.

(Naziv, sjedište i pečat Javne ustanove)

- (1) Naziv Javne ustanove je "Centar za kulturu Kantona Sarajevo" (u daljem tekstu: Javna ustanova). Skraćeni naziv Javne ustanove je: "JU CKS".

- (2) Sjedište Javne ustanove je u Sarajevu, ulica Branilaca Sarajeva broj 24.
- (3) Naziv i sjedište Javne ustanove iz st. (1) i (2) ovog člana može se promijeniti.
- (4) Odluku o promjeni naziva i sjedišta Javne ustanove donosi Skupština Kantona Sarajevo (u daljem tekstu: Skupština) na prijedlog Vlade.
- (5) Javna ustanova ima štambilj četvrtastog oblika, te mali i veliki pečat okruglog oblika, čija sadržina se uređuje Pravilima Javne ustanove u skladu sa ovom Odlukom i Zakonom o pečatima.

Član 4.  
(Svojstvo pravnog lica)

- (1) Javna ustanova ima svojstvo pravnog lica.
- (2) Organizacione jedinice iz člana 2. tač. a), b) i c) ove Odluke nemaju svojstvo pravnog lica, ali zadržavaju određena ovlaštenja u pravnom prometu, kao i poseban obračun rezultata poslovanja, u skladu sa zakonom, a što se bliže regulira Pravilima Javne ustanove.

Član 5.  
(Korištenje prostora)

Javnoj ustanovi povjeravaju se na korištenje slijedeći poslovni prostori i to:

- a) Poslovna zgrada Bosanskog kulturnog centra, u ulici Branilaca Sarajeva broj 24;
- b) Poslovna zgrada Bosanskog kulturnog centra, u ulici Alipašina broj 19;
- c) Galerijski prostor "Collegium artisticum", u ulici Terezije bb, Sarajevo;
- d) Poslovni prostor Javne ustanove za organizovanje kulturnih programa i međunarodnu saradnju u kulturi "Sarajevo art", u ulici Čemaluša broj 1.

Član 6.  
(Preuzimanje poslova, zaposlenika, opreme, arhive i sredstava za rad)

- (1) Javna ustanova preuzima sve poslove, te zaposlenike zatečene na preuzetim poslovima, opremu, arhivu, sredstva za rad i finansijska sredstva, kao i sva prava i obaveze bivših Javnih ustanova:
  - a) Javne ustanove "Bosanski kulturni centar, Sarajevo"
  - b) Javne ustanove "Collegium artisticum", Sarajevo;
  - c) Javne ustanove za organizovanje kulturnih programa i međunarodnu saradnju u kulturi "Sarajevo art".
- (2) Oprema, arhiva i sredstva za rad iz stava (1) ove Odluke imovina su Kantona Sarajevo.

Član 7.  
(Djelatnost)

- (1) Djelatnost Javne ustanove obuhvata:
  - 18.1 Štampanje i uslužne djelatnosti u vezi sa štampanjem
  - 58.1 Izdavanje knjiga, periodičnih publikacija i ostale izdavačke djelatnosti
  - 58.11 Izdavanje knjiga
  - 58.14 Izdavanje časopisa i periodičnih publikacija
  - 58.19 Ostala izdavačka djelatnost
  - 59.11 Proizvodnja filmova, video filmova i televizijskog programa
  - 59.12 Djelatnosti koje slijede nakon proizvodnje filmova, video filmova i televizijskog programa
  - 59.13 Distribucija filmova, video filmova i televizijskog programa
  - 59.14 Djelatnosti prikazivanja filmova
  - 59.20 Djelatnost snimanja zvučnih zapisa i izdavanje muzičkih zapisa
  - 74.90 Ostale stručne, naučne i tehničke djelatnosti, d.n.
  - 79.90 Ostale rezervacijske usluge i djelatnosti u vezi s njima
  - 85.59 Ostalo obrazovanje i podučavanje
  - 90.01 Izvođačka umjetnost

- 90.02 Pomoćne djelatnosti u izvođačkoj umjetnosti
- 90.04 Rad umjetničkih objekata
- 91.01 Djelatnost biblioteka i arhiva
- 91.02 Djelatnost muzeja.

- (2) Javna ustanova vrši i:
  - a) pružanje usluga u vanjsko-trgovinskom prometu u oblasti registrovane djelatnosti,
  - b) prezentaciju i unapređenje likovnih i primijenjenih umjetnosti i arhitekture (djelatnosti slobodnih umjetnika, kao što su slikari, kipari, grafičari, dizajneri, arhitekti).

Član 8.  
(Proširenje ili promjena djelatnosti)

- (1) Javna ustanova ne može promijeniti djelatnost iz člana 7. ove Odluke, bez saglasnosti osnivača.
- (2) Djelatnost Javne ustanove iz člana 7. ove Odluke može se proširiti ili promijeniti.
- (3) Odluku o proširenju ili promjeni djelatnosti donosi Skupština na prijedlog Vlade.

Član 9.  
(Pravni i drugi poslovi)

Javna ustanova ima pravo da u pravnom prometu zaključuje ugovore i vrši druge poslove i radnje u okviru svoje pravne sposobnosti i registrovane djelatnosti.

Član 10.  
(Sredstva za rad)

Izvori sredstava za rad Javne ustanove su:

- a) sredstva osnivača,
- b) od naplate ulaznica,
- c) iz naknada za obavljanje intelektualnih i drugih usluga,
- d) iz legata, poklona, donacija, zavještanja i iz drugih izvora.

Član 11.  
(Saglasnost na opšte akte)

Vlada daje saglasnost na Pravila, Pravilnik o unutrašnjoj organizaciji i sistematizaciji, planove rada i razvoja i godišnji program rada Javne ustanove.

Član 12.  
(Međusobna prava i obaveze)

Pitanja prava i obaveza između osnivača i Javne ustanove koja nisu regulisana ovom odlukom, utvrdit će se ugovorom.

Član 13.  
(Organ upravljanja)

- (1) Organ upravljanja u Javnoj ustanovi je Upravni odbor od pet članova.
- (2) Jedna trećina članova Upravnog odbora po pravilu imenuje se iz reda stručnih kadrova zaposlenih u Javnoj ustanovi.
- (3) Predsjednika i članove Upravnog odbora imenuje i razrješava Vlada.
- (4) U roku od 30 dana od dana donošenja ove Odluke, Vlada imenovat će vd Upravni odbor i vd Nadzorni odbor Javne ustanove.
- (5) Danom upisa ove Javne ustanove u Registar poslovnih subjekata Općinskog suda u Sarajevu (u daljem tekstu: sudski registar), Vlada razrješava Upravne i Nadzorne odbore:
  - a) Javne ustanove "Collegium artisticum", Sarajevo,
  - b) Javne ustanove "Bosanski kulturni centar Sarajevo" i
  - c) Javne ustanove za organizovanje kulturnih programa i međunarodnu saradnju u kulturi "Sarajevo art".

Član 14.  
(Organ rukovođenja)

- (1) Organ rukovođenja u Javnoj ustanovi je direktor.
- (2) Direktora Javne ustanove imenuje Upravni odbor na osnovu konkursa koji se objavljuje u javnim glasilima, uz saglasnost Vlade.
- (3) Direktor Javne ustanove ne može biti član Upravnog odbora.

- (4) Direktor Javne ustanove ovlašten je da predstavlja i zastupa javnu ustanovu u okviru registrovane djelatnosti.
- (5) Za provođenje postupka upisa Javne ustanove u sudski registar i brisanje Javnih ustanova iz člana 1. a), b) i c) iz nadležnog sudskog registra zadužuje se Dragan Vujmilović, sekretar Ministarstva kulture i sporta Kantona Sarajevo.

## Član 15.

(Organ kontrole poslovanja)

- (1) Organ kontrole poslovanja u Javnoj ustanovi je Nadzorni odbor od tri člana.
- (2) Predsjednika i članove Nadzornog odbora imenuje i razrješava Vlada.
- (3) Najmanje jedan član Nadzornog odbora imenuje se iz reda stručnih radnika zaposlenih u Javnoj ustanovi.

## Član 16.

(Stručni organi)

Stručni organi u Javnoj ustanovi su Programski savjet, odnosno Umjetnički savjeti za oblasti kojima se ustanova bavi, čija prava, obaveze i odgovornosti se bliže uređuju Pravilima Javne ustanove.

## Član 17.

(Slučajevi razrješenja)

- (1) Vlada razrješava predsjednike i članove Upravnog i Nadzornog odbora i prije isteka mandata na koji su imenovani u sljedećim slučajevima:
- ako utvrdi da su odgovorni za neuspješan ili nezakonit rad Javne ustanove,
  - ako je Javna ustanova poslovala sa gubitkom dvije (2) godine uzastopno,
  - na njihov lični zahtjev,
  - ako Skupština ne usvoji godišnji izvještaj o radu i finansijskom poslovanju Javne ustanove,
  - ako Javna ustanova nije racionalno raspolagala sredstvima ili u drugim slučajevima utvrđenim zakonom i pravilima Javne ustanove.
- (2) Procedura usvajanja izvještaja o radu i finansijskom poslovanju Javne ustanove, posljedice mogućeg neusvajanja navedenih akata, kao i postupak i način razrješenja predsjednika i članova upravnog i nadzornog odbora i direktora, precizirat će se Pravilima Javne ustanove.

## Član 18.

(Ostvarivanje radnih prava)

Radnici Javne ustanove ostvaruju prava u skladu sa zakonom, kolektivnim ugovorom, pravilima i drugim općim aktima Javne ustanove.

## Član 19.

(Finansijsko poslovanje)

Finansijsko poslovanje Javne ustanove vrši se u skladu sa propisima koji regulišu trezorsko poslovanje.

## Član 20.

(Rok za donošenje općih akata)

Upravni odbor Javne ustanove donijet će pravila, akt o unutrašnjoj organizaciji i druga akta u roku od 60 dana od dana njegovog imenovanja.

## Član 21.

(Izvještaj o radu i poslovanju)

- (1) Upravni, odnosno nadzorni odbor obavezan je da Ministarstvu redovno dostavlja zapisnike sa održanih sjednica upravnog, odnosno nadzornog odbora, a izvještaj o radu godišnje.
- (2) Godišnji izvještaj o radu sadrži: izvještaj o izvršenju godišnjeg programa rada, izvještaj o finansijskom poslovanju, izvještaj o radu upravnog odbora, izvještaj o radu nadzornog odbora i izvještaj o radu programskog, odnosno umjetničkog savjeta.

## Član 22.

(Nadzor nad zakonitosti rada)

Nadzor nad zakonitosti rada Javne ustanove vrši Ministarstvo.

## Član 23.

(Prijava u sudski registar)

- (1) Ovlašćuje se Predsjedavajuća Skupštine da u ime Osnivača potpiše osnivački akt i sve isprave potrebne za osnivanje javne ustanove, kao i sve isprave za koje je u skladu sa važećim zakonskim propisima neophodna notarska obrada.
- (2) Javna ustanova "Centar za kulturu Kantona Sarajevo", obavezna je da u roku od 30 dana od dana stupanja na snagu ove Odluke podnese prijavu radi upisa Javne ustanove u sudski registar.
- (3) Do sticanja svojstva pravnog lica Javne ustanove "Centar za kulturu Kantona Sarajevo", zaposlenici:
- Javne ustanove "Collegium artisticum", Sarajevo,
  - Javne ustanove "Bosanski kulturni centar Sarajevo" i
  - Javne ustanove za organizovanje kulturnih programa i međunarodnu saradnju u kulturi "Sarajevo art", svoja prava iz radnog odnosa i po osnovu rada nastavljaju ostvarivati u ovim Javnim ustanovama.
- (4) Lica zatečena na dužnosti direktora Javnih ustanova koje se spajaju, a teče im mandat, nastavljaju rukovoditi odgovarajućom organizacionom jedinicom iz člana 2. stav (3) ove Odluke.

## Član 24.

(Potpuna i supsidijarna odgovornost)

- (1) Za svoje obaveze Javna ustanova odgovara svom svojom imovinom - potpuna odgovornost.
- (2) Osnivač Javne ustanove supsidijarno je odgovoran za obaveze Javne ustanove.

## Član 25.

(Prestanak važenja Osnivačkih akata)

Danom upisa Javne ustanove u sudski registar, prestaju sa važenjem:

- Odluka o osnivanju Javne ustanove Bosanski kulturni centar Sarajevo, ("Službene novine Kantona Sarajevo", br. 3/99 - Prečišćeni tekst, 33/07 i 1/13),
- Odluka o preuzimanju prava osnivača Javne ustanove Collegium artisticum, ("Službene novine Kantona Sarajevo", br. 3/99 - Prečišćeni tekst, 10/99, 33/07 i 1/13),
- Odluka o osnivanju Javne ustanove za organizovanje kulturnih programa i međunarodnu saradnju u kulturi "Sarajevo art", ("Službene novine Kantona Sarajevo", br. 13/99, 33/07 i 1/13).

## Član 26.

(Početak rada Javne ustanove)

Javna ustanova stiče svojstvo pravnog lica i počinje sa radom danom upisa u sudski Registar.

## Član 27.

(Stupanje na snagu Odluke)

Ova Odluka stupa na snagu danom objavljivanja u "Službenim novinama Kantona Sarajevo".

Broj 01-05-24324/14  
10. septembra 2014. godine  
Sarajevo

Predsjedavajuća  
Skupštine Kantona Sarajevo  
Prof. dr. Mirjana Malić, s. r.